



SYNOD Newsletter

Volume XXVI

No. 344

E-mail : synodnews@gmail.com

May, 2012

INDIA RAM PRESBYTERIAN KOHHRAN INKHAWMPUI LIAN VAWI 40-NA MIZORAM SYNOD-IN A THLENG

- * WCC-a PCI member nih chungchang kum 2014-ah sawi leh tur.
* Minister leh Upa Synod dang aṭanga pemte dawnawn dan siam a ni.

India ram Presbyterian Kohhran rorelnaa thuneitu sang ber, Presbyterian Church of India General Assembly vawi 40-na chu Mizoram Synod-in thlengin May 2-6, 2012 chhung khan Champhai Vengsang Kohhran Biak Inah hman a ni a, he Inkhawmpui hi kum khat dan (a kum hnihna) zelah hman niin PCI hnuaia Synod hrang hrangin an inthlen chhâwk ṭhin a, a nghahna Kohhran hi chu a thlengtu Synod-in remchang an tih angin an thlang mai ṭhin. Kumin General Assembly-ah hian PCI hnuaia Synod hrang hrang aṭangin palai an kal ṭha hle. Palai kal zawng zawng hi an vaiin 952 an ni.

Palai kal dan hetiang a ni:

Mizoram Synod	350
KJP Synod Sepngi	195
KJP Synod Mihngi	130
Manipur Synod	63
Cachar Hill Tribe Synod	63
Ribhoi Synod	42
Zou Synod	40
Biateram Synod	38
KAGAA (Karbi Anglong)	16
PWF	12
PYF	3
TOTAL	952

Inkhawmpui Puipate

Moderator	: Rev. S.I.Iawphniaw <i>KJP Synod Sepngi</i>
Moderator Elect:	Rev. D.C.Haia <i>Biateram Synod</i>
Secretary Sr.	: Rev. Zosangliana Colney <i>Mizoram Synod</i>
Secretary Jr.	: Rev. Awnkhankhup <i>Zou Synod</i>
Treasurer	: Rev. W.C.Khongwir <i>KJP Synod Sepngi</i>
Statistician	: Rev. R.K. Marsing <i>Ribhoi Synod</i>

Administrative Secretary-te

- 1) Rev. Lalramliana Pachuau*
 - 2) Rev. S.S. Majaw
 - 3) Rev. David L. Lhouvum
- *Sl.No (1) hi May, 2012-ah a term a tawp.

ROREL PAWIMAWHTE

- 1) Kum 2014-a PCI General Assembly thlengtu tur KJP Synod, Mihngi. Thupui: ***The prophetic roles of the Church today.***
- 2) Kum 2013 - 2016 chhunga Presbyterian Youth Fellowship Leader atan Rev. J.H. Lalropuia, Manipur Synod ruat a ni.



3) Kum 2013 - 2016 Presbyterian Women Fellowship Chairman atan Pi K. Lalliantluangi, Mizoram Synod ruat a ni.

4) PCI Administrative Secretary-te hi General Secretary tia thlâk rawtna chu General Assembly (2010) rawtna angin Synod hrang hrang ah sawi ho a ni a. Synod paliin an duh laiin Synod paliin an duh lo va, Administrative Secretary tih hi thlak a ṭul lo tih a ni.

5) World Council of Churches (WCC)-a PCI Member nih ve thu-ah General Assembly-in Synod hrang hrang a râwn a. Synod parukin ṭha an tih laiin Synod pahnihin ṭul an ti hrih lo va. General Assembly 2014-a sawiho leh tura dah a ni.

6) Synod pakhat aṭanga Synod danga

Minister pem chungchang hetiangin rel a ni:

i) **Minister thawk lai:** Synod mamawh leh ṭulna avânga Synod danga Minister a pem dawn chuan a hlawh leh ṭul dang apiang chu Synod pahnih inremna anga kalpui tur a ni. A pemna lehkha chu Synod hmasa berah chhiar tur a ni.

ii) **Minister pension:** Minister Pension chu Synod hmasa berah a pem lehkha chhiar a ni ang a, Bial, Presbytery leh Synod Inkhawmpuiaah leh Tualchhûng Kohhran leh Presbytery Standing Committee-ah member nisa a ni ang. Synod Committee-ah pawh ruat theih a ni ang.

7) Synod pakhat aṭanga Synod danga Kohhran Upa a pem chuan a Upa nihna

SYNOD NEWSLETTER

Editorial Staff

Rev. K. Lalpiangthara (LPT)
 Rev. B. Lalngkhakliana (BLNG)
 Upa H. Ronghaka (HR)
 Upa C.H. Thangkhuma (CTK)



BUAI RENG RINGTU

Lehkha thiam kan tam tawlh tawlh a, kan hmanruate pawh a thain a changkang tawlh tawlh a, kan buai tawlh tawlh thung niin a lang. Chhungkhatte pawh tlawh hman lo khawpa buai inti te, damlo tlawh hman lo khawpa buai inti te, chhiatni thatnia leng hman lo khawpa buai inti te, chhung inkhawm nei hman lo khawpa buai inti te, Pathian biak inkhawm pawh hman lo khawpa buai inti te kan tam ta hle mai. Marthi anga 'Lalpa aw' takngial pawh dawngsawng hman lo khawpa mahni hnaa buai intite pawh kan kat ta nuk mai zawng a nih hi ! Lal Isua hi Zoram dung leh vangah han leng vel sela chuan, "Thil tam tak i ngaihtuah a, i buai a nih kha," a tih khum ve tur kan tam hlein a rinawm.

Mi thenkhat thawh tur ngaihtuaha an buai em em lai leh thenkhat an hna avanga an buai em em laiin thenkhat chuan buai inti tho siin TV leh Computer hmaah chuan an tawlh hman hle tho va. Kan tih turin min tihbuaina lam aiin kan jawngka chhuak lamah hian buai inti hi kan tam ve hrim hrim zawk emaw tih mai tur a ni ta. Mi thenkhat hi chuan inphat mar nan leh mahni sa him nan chhuanlamah kan nei mai mai niin a lang. Tih tur ngah deuh tum chu thil awm thei a ni a, hetiangah pawh hian rilru lam hi tihbuai duh hauh loh tur a ni.

Khaw khat leh veng khatah pawh hian 'ka buai lutuk a' ti reng mai pawl hi awm a ni ve reng reng a. Hetiang mite hian ngaihsan aiin nuihzat an hlawh chwkw. Fur khaah kan lut chho leh tan a, khawtlang thila kan inhmannaah te leh rawngbawlina kawng hrang hrangah leh inkhawm chungchangah te pawh 'buai chhuanlama nei' kan tam leh ang tih a hlauhawm. Rawngbawlina lamahte pawh hian ruat lohva vui si, ruata 'buai' chhuanlama nei leh lawi si a awm theih. Pathian lakah pawh kan inthiamna turah chauh 'ka buai lutuk a' tih hi i hmang ang u (LPT)

MISSIONARY-TE INTUAI THARNA

May 17 - 20 hian Bethlehem Kohhranah Synod Mission Board hnuaia India Hmarchhaka Missionary-ten Intuai tharna hun an hmang dawn. Retreat Thupui, 'Hma i sawn zel ang u' tih chu Rev. Vanlalzuatan a sawi ang. SMB Missionary-te bakah hian an kawppui te pawh kal tura tih an ni a, Mission dang nena thawhona hnuaia thawk te, Field Worker Mizo te, Tent Making Ministry hnuaia Mizo te leh Kohhran leh mi mal chawm Mizo Missionary te pawh tel tura beisei an ni bawk.

phêk 1-naa mi zawm

Presbytery atangin pem lehkha a la ang a; a pêm luhna Presbytery leh tualchhông Kohhran-ah a theh lut ang. Pem upa atan pawm a nih hnuaah Pastor Bial leh Presbytery inkhawmpui member nisa a ni ang. Thlan nawn theih a ni a, thlan nawn a nih chuan Upa atan puan mai tur a ni.

8) Thalai & Hmeichhia Synod-a an palai dân tur chungchânga PCI dân hrilhfiahna hetiangin siam a ni:

i) **Dân bu Bung V.B. 16:-** Presbytery-in palai a tih theih zat (*quota*) chhungah thalai leh hmeichhe aiawh Synod-a palai tur ruat tur a ni.

ii) **Dân bu Bung V.C. 2.e:-** Synod-in ruat zât tur a tuk angin thalai leh Kohhran hmeichhiain an ruat ang.

9) PCI Mission statement (Din chhan) siam thar a ni.

10) Kum 2012 atanga 2016 PCI Administrative Secretary atân Rev. V.L. Luaia Hranleh (Mizoram Synod) ruat a ni. June 1, 2012 -ah Office a zawm ang.

11) PCI Peace and Justice Committee chu The Society Registration Act hnuaiah inziah luh (*register*) phalsak a ni.

12) KJP Regional Assembly-in PCI Executive Committee-a member pahni tel ve an dilna chu Executive Committee zir chian tura dah a ni.

13) PCI General Assembly hman hun nghet siam rawtna chu remtih a ni a, Executive Committee-in a ni hman nghal turin lo siam se tih a ni.

14) PCI Administrative Secretary kum li term hi kum thumah thlak remtih a ni.

15) Manipur Meitei Synod siam rawtna chu Executive Committee-in a tul anga a lo enzui tura tih a ni.

16) PCI Puipate inthlak dan (a bik takin Secretary-te) tihdanglam rawtna chu kal dân pangngai a tha e, tih a ni. (No. 13-16 hi Mizoram Synod atanga lut a ni)

17) Assembly Day of Prayer thuchah siam thin hi Sermon type a ziaik thin tawh tura tih a ni. (CHT Synod atanga lut).

PCI chhungah hian Synod 8, Administrative Area 1, Presbytery 111, Pastor Bial 542, Kohhran 2,767, Branch Church 984, Minister 899, Pro Pastor 118, Kohhran Upa 9898, Danzawhkim 7,11,192, member zawng zawng 12,71,473 an awm a ni.

Kumina Inkhawmpui thlengtu Champhai Vengsang Kohhran hi danzawhkim 864, Kohhran member 1226, chhungkua 249 chauh awmna an ni naa, an thleng hneh hle.

Thu lakna : Upa D.P. Biakkhuma, Secretary, Mizoram Presbyterian Church Synod

NUN DAN

CHHANGCHHE BÂWM

Chhim lama Kohhran mi tlem tê kan awm lai chuan chhangchhe bawngbawrin kan inkhawm thin a, zan lamah pheih chuan tlar hnung lam thutthleng awlah naupang an mu phung thin. Inkhawm bân rualin mahni fate theuh kan chuh sang sang a, pa hnung a awl thei bik lo va, puak leh kaih fâwmin Biak in kan chhuahsan diah diah a. Biak ina naupang awm dân chu eng ang pawh ni se nu leh pa mualphona ngaih a ni lo va, harh mang lova in thlenga kan inkaih dawt dawt pawhin 'hetiang châng hi chu a awm ve fo a nia,' tiin inkhawm thulhna thama ngaih a ni ngai reng reng lo.

Kohhran hmasawnna hian naupang tel lova inkhawm a keng tel ta em ni aw! Biak ina naupang a thain nu leh pate'n zahthlakah kan ngai a, fate vanga mi zinga mualpho hlauh vang ringawtin fate kan inkhawmsan a, tlema an leikân deuh chuan Biak in chhông thleng khât zâwngin naupang inkhawm lamah an inkhawm leh daih a. Kohhran hmasawnna hian Biak inah naupang a len lohtir chho zel a nih chuan pawh kan la ti ngei dawn a nih hi. Chu chang a ni lo, khawvel hmasawnna hian kan in chhungah naupang hmuh leh hriat duh zawng thil tam tak min chhawpsak tawh a, inkhawma kan hruai loh hian an tân a hrehawm hran lo va, nu leh pa awm loh hlana ina awm hi tunlai naupang tân khawharthlak a ni tawh reng reng lo.

Engtin nge kan tih ang? Kohhranhote hian Biak ina chhangchhiat kan zir thar leh a ngai tawh a ni lo maw? Biak in hi thalai leh nu leh pate inkhawmna tur chauh ni lovin naupangho inkhawmna hmun tur pawh a ni tih kan hriat thar a tul ta. Kan faten Biak ina inkhawm an châk loh pawhin kan hruai luih tlat a ngai a, naupang an nih hre chungin ngaihnathiamna thui tak i nei baw ang u. Kohhranho infuihna leh intuaitharna hian naupang a thlen phâk loh chuan 'a tlai lutuk hun' kan la thleng ang a, Biak in thleng ngai lo naupang chu a tleirawl hunah Biak in lam hawitir a khirh talh mai thei! Biak in hi chhangchhe bawmah siam thar leh ila, an phak tawh a nih miau avangin an bengchheng deuh pawhin i hrethiam ang u. Kan tu kan fate hi Biak in leh a vèlah tlângnêl rawh se. Biak in chhônga Kohhranho an bengchhen deuh chuan 'kohhran nung tihna' an ti thin a nia! (CTK)

INKHAWMPUI KAL HAW LAM MOTOR CHESUAL

May 8, 2012 PCI General Assembly-a Biateram Synod atanga palai lo kalte chuanna motor chu Silchar thlen hma Nutun Bazar-ah a chesual a. Vanduai thlak takin a hmunah Upa T.C. Neiha a thi a, Upa Lawmzathanga pawh na takin a hliam a, Silchar Medical College-ah enkawl zui nghal a ni. An chuanpui dangte zingah chuan Damdawi ina enkawl ngai an awm lo hlauh.



Tûk khat chu tûk dang ang lo takin khuua mite chu Râl Vêngtu râl venbûk bulah chuan an rawn thu tlim hmur mai a. Râl Vêngtu chuan mite hnenah chuan, “Engtizia nge tûkina taka in lo thut ngûk mai le? Hlahu nei ang maiin tang deuh hrû hlawm leh ngûk a,” tiin a zâwt a. Mite chuan, “Niminah mikhual an lo thleng a, Pu Râlzia te inah an thleng a, nizan khan an thlen inah Pathian thu ngaithla turin khuua mite min sawm khawm a. Sakawlh hlahuawmzia te, Kohhrana hming ziah a him lohzia te, Ration card-a hming ziah a paw theih dan te leh chhungkaw hming ziah a ngaihna rêng rêng chu lo hnimhnai lo turin min hrilh a; kan Halelui nasa mai maw le!” tiin an chhang a.

Râl Vêngtu chuan, “Chu vang a nih chu in tît hrû ni. Bible-in ‘hlaui suh’ tia vaw tam tak a hrilh che u hi in chhiar ngai lo em ni? Kristian Hla bua ‘Hlaui suh Pathian i phaw’ tihte leh ‘Hlaui suh la Pathianin a veng ang che’ tih hlate lah in sa in sa a; engtiziaa hlahu loh tur tur hlaui nge in nih? Lal Isuan hlahu tur dik tak leh hlahu loh tur a sawite kha in hre ve baw lawm ni? Hman deuhah pawh khawchhak lungpui hlahu hna thlarauin mi tam tak a bum tawh kha. Hlahu hna hmanga ringtute beitu rêng rêng chu Setana a ni zel tih lo hria ula. Hlahu tur dik tak chu Pathian chauh hi a ni tih hi lo hre tawh ula. Halelui-na tur âwm leh âwm lo pawh hi hre rual in ni tawh,” tiin Sermon patê a thlâk a.

Mite chuan, “Kan mikhualte kha hlahu hna thlarau kan chan theih nana Setana hmanrua an ni Chiang mai, tûkthuan pawh eitir lova hnawchhuah ngûk tur an ni,” an ti a, Râl Vêngtu thusawi chu thu dik tak a nih zawkzia hriain thlamuaang takin mahni in lamah an tîn leh ta a.

PCI ADMINISTRATIVE SECRETARY THAR - REV. V.L. LUAIA HRANLEH

India ram Presbyterian Kohhran (PCI) Headquarters Office, Shillong-a Administrative Secretary hna thawk turin Mizoram Synod atangin Rev. V.L. Luaia Hranleh thlan/ruat thar a ni. Hqrs. Office-ah hian Administrative Secretary pathum an awm a, mi dang pahnihte hi KJP Synod Sepngi leh CHT Synod mi an ni. Rev. Luaia hian June 1, 2012 atangin a hna hi a zawm ang.



ZAWHNA LEH CHHANNA

Zawhna : *Pathianni serh kan inzirtir thin dan ang hian doctor te, nurse te, police te, fire department te, taxi te hian ‘chawlhni ka serh’ tiin chawl ta thuap mai se a buaithlak hle lawng maw? Isuan, “Chawlhni hi mihring tana siam a ni a, mihring hi chawlhni tana siam a ni lo” a tih leh “Inthawina aini khawngaihna ka duh zawk,” a tihte hi kan hre fuh lo deuh em? Mahni mihring puite tana tha tur a nih dawn phawt chuan ringtute chu chawlhni a ni emaw, ni lo emaw kan phe lawp lawp mai tur a ni zawk dawn lawm ni?*

– Dr. Para, Upper Republic

Presbyterian Church of India Thurin IX-naah chuan, “...Lalpa Ni serh thianghlim te, Amah be ho tura inkhawm te, A thu hril ngun taka ngaihthlak te...” tiin Pathianni serh chungchang kan hmu a. Kristian Nun Kaihhruaina, Kristian Nun - Sakhaw lam (2)-ah chuan, “Ringtu zawng zawngten Pathianni an serh tur a ni. Khawvel hna tih lawk theih leh ni danga tih theih - lei leh zawrh te, thu pawimawh dang sawi te tih loh tur a ni. Hahchawlh nan hmanga mut bo nan leh mahni chakkhai lam nana hmang lovin, Pathian biak nan leh a thu ngaihthlak nan te, an thlarau tana sâwt tur apiang tih nan te an hmang tur a ni,” tih a ni baw.

I rawn sawi ang deuh hian doctor te, sipai te, police te, etc. hi han chawl thup mai selang chuan a buaithlak viauin a rinawm. Hei hi Kohhran pawhin a hriat avangin Pathiannia mahni hna tula kalte pawh ngaihnathiamna thui tak a nei a, zawldawh takin Kristian Nun Kaihhruaina lamah pawh tarlan a ni. Duty tûl avang te, dam lohna avang te, chhiatna avanga inhmang te leh Pathiannia exam ngai tlatte chungah pawh Kohhranin thununna a lek hriat tur a vang khawp mai. Amaherawhchu, ringtu chuan Pathianni a ngai pawimawh tur a ni a. Duty thin nih avanga mahni hman niah pawh inkhawm lova hahchawlh nana miin a hman chuan a tan sual a tling thung ang. Mahni inhmakhua theih chin chinah chuan a inhmakhua ang a, Pathian leh a mihringpuite lakah pawh a inthiam theihna tur leh mi dang mit pawh timim lo zawnga a awm theih nan, loh theih lohna in a tlakbuak a nih chauh loh chuan Pathianni a serh tur a ni. Engpawh nise, Kristian pangngai chuan Pathian laka inthiam chin leh inthiam loh chin a nei mai thin a, Johanan, “Duh takte u, kan rilruin thiam loh min chantir loh chuan Pathian lamah kan huai a ni,” (I Joh. 3:21) a tih ang hian Pathian lama kan huai theih nan kan rilru pawhin thiam min chantir theih tura kan nun a pawimawhin a lang.

RUIHHLO DO CHUNGCHANGA INRAWN KHAWMNA

Mizoram Synod Social Front chuan May ni 2, 2012 khan Synod Conference Centre-ah Ruihhlo dona kawnga chak zawka hma lak dan tur inrawn khawmna a buatsaih a, khawpui chhung Presbyterian Kohhran Social Front Committee Chairman leh Secretary theuhte bakah CYMA, Mizoram Excise & Narcotics Department-te sawm an ni a, mi 180 zet an kal khawm.

He inrawn khawmna hi Rev. Lalzuithanga, Executive Secretary-in a kaihrui a, thu zir ho tura buatsaih (concept paper) zir ho a nih hnuah inrawn khawmna neih zui a ni. Mizoram Presbyterian Kohhranin thalaite rilruah ruihhlo mamawhna a bo theihna tura inzirtirna chi hrang hrang a lo kalpui tawh dan te; camping, seminar leh workshop te buatsaih thin a nih thu te tar lan a ni a. Ruihhlo vanga buaite tan Rescue Home siamin mi tam tak an enkawl tawh baw a ni.

Mizoroma ruihhlo hluar chho zel titawp tura beitu pawl hrang hrangte tha tichak turin Mizoram Presbyterian Kohhran chuan a theihna lai laia lo tan ve chu a tih tura ngaiin Synod 2011 khan Ruihhlo dotute tha tichak zawnga hma lak a rel a, vawin thleng hian heti lam zawng hian tha a thawh chho ta ngar ngar a ni. Inrawn khawmnaa kalte chuan hetiang hian rawtna an siam :

Kohhran tih tur -

1. Presbyterian Kohhran member zu zuar tih hriat chian leh an rui lai hmuh ngeite chu PCI Dan bung 3:1 angin hma lak ni se.
2. Zu in pawizia inzirtirna lehkhabu, Comics/Animation leh drama te buatsaih ni se.
3. Zu zuartuten eizawna kawng dang an zawh theih nan hma lak ni se.
4. MLTP Act hmanga zu man rêng rêng khawiah mah chhuak leh tawh lo se.
5. Pulpit sermon-a sawi rik tam lehzuall;
6. Zua harsatna neite buaipui;
7. Counselling lama tan lak.

Sawrkara beisei tur -

1. MLTP Act-a hremna awm hi tun aia na zawka siam;
2. Zu in phalna pek fimkhur lehzuall leh permit lem enfiah;
3. Ram pawn atanga zu in tur rawn la lutte Vairengte check gate leh Lengpui Airport-a check uluk leh hmelhriat nei thate phurh tlangtir loh.

Mizoram Excise & Narcotics Dept. Record-ah chuan 1984 atang khan Mizoram drugs vanga thi hriat tan a ni a, November 3, 2011 thlengin mi 1,194 zet in ruihhlo chi hrang hrang avang hian nunna an lo chan tawh a, heng zinga 1073 te hi mipa niin 121 chu hmeichhia an ni.

MISSIONARY-TE TIRH CHHUAHNA

Synod Mission Board hnuiaa thawk tur Pastor pali leh contract missionary-a lak thar Evangelist pali, Evangelist Teacher pakua leh Staff Nurse pathum te leh Council for World Mission (CWM) hnuiaa Geneva, Switzerland-a Missionary-a kal tur (mi pakhat) Tirh chhuahna (Inkhawm) chu April 15, 2012 zanah Dawrpui Vengthar Kohhran Biak Inah hman a ni.



Sialhawk Kohhran chuan March 6 - 16, 2012 chung khan Pu R.Lalramliana (Gospel Thunder Team Speaker) ruaiin camping chhawng hnih an buatsaih a, campers 326 zinga 24 chu Kohhran pawl danga mi an ni. Thlarau Thianglim hnathawh ropui takin a thlang a, Biak In lâmtuala leng lo khawpin an lâm a, Pathian duh loh zawng thil eng emaw zat hâl ral a ni baw. Mi thahnemngai chhungkaw hnihin vawk an thawh a, chhungkaw khatin bawng chal an thawh baw a; Rs. 6,000/-thawh chhungkaw hnih awm bawkin heng hmanhian April ni 2, 5 & 7 khan Kohhranin Pathian an chawimawi a, Pathian hnathawh a ropui hle.

East Phaileng Kohhran chuan March 10 - April 8, 2012 thlang khan Upa Lalchhanhima Hnamte (Mi Lunggaite Thian Team) Speaker-a hmangin camping leh crusade leh Naupang Lâng Camp an buatsaih a, camping-ah hian campers 432 an lut. Biak In thlang phak ngai lo leh Pathian faka lâm ngai lote Pathian fakin lamtual khatin an lâm a, Kohhran pawl dang - Baptist leh U.P.C. mite pawh eng emaw zat camp-ah lut vein an hlim tlang hle. Hetiang taka thlarau lam boruak tha an neih avang hian manhla hlein an hria.

Zote (Champhai) Kohhran chuan March 19 - April 6, 2012 chung khan Tv. K. Lalnunpuia (Revival Fire Team) ruaiin camping chhawng thum an buatsaih a, camper zawng zawng Krista chhandamna leh siam tharna changin hlawhtling takin an chhuak hlawm. Camp chung hian Naupang pual Lâng Camp buatsaih a ni baw.

Lungphun Kohhran chuan Dt. 24.3.12 - 4.4.12 chung khan Pathian Thuruk Enkawtu Team Speaker Pu Laltindawla ruaiin camping chhawng hnih an buatsaih a, campers 110 lutin Pathian Thlarau Thianglim hnathawh ropui takin a thlang a. Inkhawm ngai lo leh jawngtai ngai loten hartharna an chang a, April ni 7 khan mi inphal chungkuain vawk an thawh a, Thlarau lam ruai leh tisa ruai ropui takin an kil ho.

Buang Kohhran chuan March 25 - April 7, 2012 chung khan Lalngaihzuale (Krista Kros Thlangtu Team) Speaker-a hmangin camping an buatsaih a, mi 110 lutin hlawhtling takin an chhuak vek a; ruihlo ngaite leh inkhawm ngai tawh loten an sual an sim a, Pathian faka zai leh lâm nuam an ti hle. Mi inphal chungkuain Pathian chawimawi nan vawk pahni an pe a. Tisa leh Thlarau lam ruai hlim takin an kil ho.

Tlangpui Kohhran chuan April 4 - 19, 2012 chung khan Pu Zaihmingthanga (Gospel Thunder Team) Speaker-a hmangin camping chhawng hnih an buatsaih a, campers 216 an lut. Kohhran ngaihsak loten Kohhran an bel thar a, ringtu nun nghet an neih theih nan Kohhranin theitawp chhuahin camp an bawhzui baw. Naupang Lâng Camp pawh wavi hnih buatsaih a ni. He rawngbawlna kal zel avang hian Kohhranah hming pe thar mi panga lai an awm a. Kohhran leh mi mal thawh khawm atangin Pathian chawimawina ruai wavi hnih buatsaih a ni nghe nghe.

Tawipui N-II Kohhran chuan April 24 - May 2, 2012 chung khan Pu Biakhmingthanga, Krista Thiante Team Speaker ruaiin Crusade hlawhtling tak an buatsaih a, Kohhran pawl dang atangin mi duhawm tak tak pathum lawm luh an ni. Kohhranhote an hlim tlang hle.

MISSIONARY PASTOR-TE PUAL TRAINING

Missionary Training College (MTC) chuan Synod Mission rawngbawlna hmun (Field) hrang hranga Synod-in Missionary Pastor leh Field Secretary a dah tharte pualin May 8 - 15, 2012 chung hian MTC, Mission Vengthlangah Ramthar rawngbawlna leh a kaihnnawih hrang hrang zirna an buatsaih a, Pastor pariat leh Field Secretary pakhat an kal a, pahni chu ATC-a an la zir avangin an tel thei lo va, chhungkaw rokhawlna avanga tel thei lo pahni an awm baw. He Training/Orientation-ah hian Ramthar rawngbawlna hmun hnam hrang hrang nunphung te inrelbawlna leh mi mal inenkawlna chungchang te, sum vawn leh office hna thawh dan kalhmang te, missionary fate enkawl chungchang te, missionary nun dan te, tunlai huna mission theology te, Chanchin Tha hril leh sakhaw danga inleh chungchang te, ram dan nena a inkaihnnawihna chungchang te, mission râl rel dan te an zir a. A tawp lamah Synod Mission Board hotute nena inkawmhona hun an hmanhian baw. Training-naa kalten an hlawkpui hle.



SAWMNA

Sawlung Hmuntha Kohhran chuan June 2, 2012 (Inrinni) khian an Biak in sak thar an hawng dawn a. He hun hmanpui tur hian an Kohhrana lo lawi tawh zawng zawng te, Bialtu Pastor leh Pro. Pastor lo ni tawh te, duhsaka thil petu zawng zawngte an sawm.

NILAI LEH BEIHRUAL THUPUI BU A AWM LEH TA

Kum 2012 Nilai leh Beihruai Thupui Bu chu 48,000 copies lai chhut a ni chungin March 2012 khan a zo der mai! A chang ve lote ngenna ngai pawimawhin bu 1,500 lek chhut belh leh a ni a, i lo la nei ve lo a nih chuan Synod Bookroom hnai berah lo ngaihven rang teh. Chan loh palh a la awm thei cheu.



A man Rs.70/-


RAM NGAW HUMHALH LEH A KAIHNNAWIH ZIRNA

April 24 khan Synod Conference Centre-ah Zoram Research Foundation (ZRF) leh Mizoram Synod Social Front chuan Mizorama ramngaw humhalh leh a kaihnnawih thil chungchang zirhona (*Seminar on Forest Reservation & Its Related Issues in Mizoram*) an buatsaih. Seminar hi Prof. Thangchungnunga, Chairman, ZRF-in kaihruaiin Pu Lalkhama, Vice Chairman, State Planning Board-in an thu zir ho tur tlangpui a sawi hmasa a, Khuallian Pu J.H. Rothuama, Land Revenue Minister-in ram leilung enkawl leh humhalh kawnga Mizoram sawrkar hmalak dan leh a zir chiangtu tur Expert Committee a lo din tawh dan te a sawi a. Minister chuan Mizoram mipuite leh ngaihtuahna seng peihte chu he committee-ah hian thurawn pe thin turin a sawm a, ram chungchangah Dan mumal tak Mizoram sawrkarin a neih theih thuai a beisei thu a sawi baw. Luipui, phai leh ram zawl tha laite Forest Department-in an humhalh (*reserved*) thin chu Mizo mipuite tan tihdanglam dan awm thei se a that a rin thu a sawi baw a ni. Hunserh hmanthu Rev. Lalzuithanga, Executive Secretary, Mizoram Synod pawhin Mizoram Synod-in Land Reform chungchanga hma a lo lak tawh dan leh sawrkarah rawtna hrang hrang an lo thlen tawh dan te a sawi baw.

Seminar-ah hian Dr. Robert S. Halliday, Co-ordinator, Mizoram Synod Social Front, Dr. Lalnundanga, Associate Professor, MZU te, Pu Lalduthlana, ACF, te, Pu B. Lalramenga, Advocate te, Pu V. Lianzinga, OSD, Revenue Department-ten an thuziak an chhiar a, Dr. H.T.C. Lalrinchhana, Senior Civil Judge-in Seminar khaikhawmna hun a hmanhian. Khaikhawm zawhah hian Pu Rochamlia, General Secretary, ZRF-in thu sawihote zir chianga bawhzuitu tur Study Group din dan a puang a, Convener atan Pu S.L. Sailova, IAS (Rtd.), Member Secretary atan Hilda Lalrinpuui, Research Scholar, Department of Forestry (Mizoram University) te ruat an ni..

SL&PB LEHKHABU THAR

NI TIN LALPA NÊN (Revised Edition 3rd Reprint)



Ni tin Chhûng Inkhawm hmanhian theihthei tana lehkhahu hman tur remchâng tihchhuah hmasak ber, "Ni Tin LALPA NÊN" tih chu a pumpuia enawna ziaak thar a ni a, a hmanhian tlangte chuan an ngaina tlat zel. Chhut thumna a lo chhuak leh ta.

A man Rs.100/-